

СЕНТЯБРЯ В 28 ДЕНЬ
СВЯТАГО БЛАГОВЕРНАГО КНЯЗЯ МУЧЕНИКА
ВЯЧЕСЛАВА ЧЕШСКАГО

На Господи, возвах, стихиры на 3. Глас 8-й.

Подобен: О преславнаго чудесе:

Трисветлыми зарями пресветло / украшен паче солнца, / сушим в бедах возсия, / Вячеславе предивный, / разрешая связанных без правды / и болезни всякия отгониши зовущим верно тя на помощь, / любовьию поющим всечестное ти успение.

Грядите вси вернии, / память пречудную духовно празднуем / Христова служителя Вячеслава днесь, / оставль бо земное служительство тленное, / Небесно Царство приял есть, / и в руце Владычни пресвятую свою душу днесь предал есть, / прославляя Господа Удивльшаго память его.

Любовию ведом вышняго звания / в Церковь Христову идяше, преблаженне, / у неяже прият венец царский / и нетленен и непреидущ, / имже озарися яко солнце западу / и северным странам светлую зарю испустив чудес, / поющим память ти прехвальную, / святе Вячеславе непобедимый.

Слава, и ныне, Богородичен:

Безневестная Дево, / Яже Бога неизреченно заченши плотию, / Мати Бога Вышняго, / Твоих рабов мольбы прими, Всенепорочная, / всем подающи очищение прегрешений: / ныне наша моления приемлющи, / моли спастися всем нам.

Посем Свете Тихий:

Прокимен дне:

На стиховне стихиры, глас 8-й

Подобен: О преславнаго чудесе:

О преславнаго чудесе, / яко от нераждающия матере и неплоднаго заматерения, / Жезл цвет носяй, прозябает днесь, / Богомати и Неискусобрачная, / от праведных Иоакима и Анны. / Темже радуется ныне и пророческий собор, / патриархов все торжество в Рождестве Ея.

Стих: Слыши, Дщи, и виждь и приклони ухо Твое.

Днесь Давид радуется, / и Иессей ныне играет, / и Левий величается, / и радуется духом Иоаким праведный, / и безчадство Аннино разрешается / Твоим Рождеством, Марие Пречистая Богорадованная, / и ангельский собор с человеки, / вси блажим Божественную утробу Твою.

Стих: Лицу Твоему помолятся богатии людстии.

Радуйся, человеческий соборе, / радуйся, Господень храм, / радуйся, Горо святая, / радуйся, Божественная Трапезо, / радуйся, Светильниче Света. / Радуйся, Славо православных, Честная. / Радуйся, Марие, Мати Христа Бога. / Радуйся, Всенепорочная. / Радуйся, Предложение Божественного хлеба. / Радуйся, Скиние. Радуйся, Купино Неопалимая. / Радуйся, всех Надеждо.

Слава, и ныне, Глас 4-й. Германово

Всемирная радость / от праведных возсия нам / от Иоакима и Анны всепетая Дева, / Яже премногия ради чистоты, / Храм Божий одушевленный бывает, / и Едина воистинну Богородица познавается. / Тоя молитвами, Христе Боже, / мир миру низпосли и душам нашим велию милость.

Таже, Ныне отпускаеши: Трисвятое. И по Отче наш:

Тропарь, глас 4:

Днесь Ангели с человеки разуются / вкупе общим веселием. / Небо и земля светло ликуют в память ти, святе. / И мы, грешнии, прилежно ти вопием: / помолись к Владыце о нас, / избавити ны от напасти, / видимых и невидимых враг, / чтущих пресветлую ти память.

Богородичен: глас 4:

Еже от века утаенное, / и ангелом несведомое таинство: / Тобою Богородице сущым на земли явися Бог, / в неслитном соединении воплощаемь, / и крест волею нас ради восприим, / имже воскресив первозданного, / спасе от смерти души наша.

НА УТРЕНИ

На Бог Господь, тропарь святого дважды.

Слава, и ныне, Богородичен: Еже от века

По 1-м стихословии седален, глас 8.

Любовию ведом вышняго званія / в Церковь Христову идяше, преблаженне, / у неяже прият венец царский / и нетленен и непреидущ, / имже озарися яко солнце западу / и северным странам светлую зарю испустив чудес, / поющим память ти прехвальную, / святе Вячеславе непобедимый.

Слава, и ныне, Богородичен:

Безвестная Дево, / Яже Бога неизреченно заченши плотию, / Мати Бога Вышняго, / Твоих рабов мольбы прими, Всенепорочная, / всем подаючи очищение прегрешений: / ныне наша моления приемлющи, / моли спастися всем нам.

По 2-м стихословии седален, глас 4.

Пролитием пречистыя крове ти, / Вячеславе прехвальне, / Церковь Христову украси яко царскою багрянницею, / ею же украшшиися, / вся страны собирает на лик, / пресвященную ти память светло праздновати / и верно Благоделю и Творцу всех вопити: / слава Ти, Христе, / Удивльшему память святого Своего.

Слава, и ныне, Глас 4-й. Германово

Всемирная радость / от праведных возсия нам / от Иоакима и Анны всепетая Дева, / Яже премногия ради чистоты, / Храм Божий одушевленный бывает, / и Едина воистинну Богородица познавается. / Тоя молитвами, Христе Боже, / мир миру низпосли и душам нашим велию милость.

Степенна, глас 4. Антифон 1-й, ихже стихи повторяюще поем:

От юности моя / мнози борют мя страсти, / но Сам мя заступи, / и спаси Спасе мой.

Ненавидящии Сиона, / посрамитесь от Господа, / яко трава бо огнем / будете изсохше.

Слава: / Святым Духом / всяка душа живится, / и чистотою возвышается, / светлеется Троическим Единством священнотайне.

И ныне, тойже.

Прокимен, глас 4:

Честна пред Господем смерть преподобных Его.

Стих: Что воздам Господеву о всех, яже воздаде ми.

Всякое дыхание да хвалит Господа.

Евангелие Иоанна, зачало 36: Рече Господь Своим учеником: Аз есмь дверь:

По 50-м псалме

Слава: / Молитвами апостолов, / Милостиве, очисти / множества согрешений наших.

И ныне: / Молитвами Богородицы, / Милостиве, очисти / множества согрешений наших.

Таже, глас 6: Помилуй мя Боже / по велицей милости Твоей, / и по множеству щедрот Твоих / очисти беззаконие мое.

Стихира, Глас 6:

Любовию ведом вышняго званя / в Церковь Христову идяше, преблаженне, / у неяже прият венец царский / и нетленен и непреидуш, / имже озарися яко солнце западу / и северным странам светлую зарю испутив чудес, / поющим память ти прехвальную, / святе Вячеславе непобедимый.

Канон святому, глас 6:

Песнь 1.

Ирмос: Яко по суху пешешествовав Израиль / по бездне стопами, / гонителя фараона / видя потопляема, / Богу / победную песнь / поим, вопияше.

Ликуим вернии радостно, светлыми душами воспоюще Спаса на память пречудную Христова служителя Вячеслава днесь.

Владычним страстем славне уподобися, яко агня непорочно без правды убиваем, тем с лики мученик, Богоблаженне, ныне веселишися.

Смерть ходатаицу жизни приим, всяческим Владыце ныне в славе предстоиши. Еяже и нам улучити умоли, святе, творящим твою память пречудную.

Кто исповесть твоя чудеса, славне, яже твориши в мире без числа, выну бо всем верным обильно даеши исцеление.

Богородичен: Впадша мя в разбоя душегубными делы и смертью потоплена воздвигни, молю Ти ся, Госпоже, Сыну Своему и Богу за мене помолися.

Песнь 3.

Ирмос: Несть свят, якоже Ты / Господи Боже мой, / вознесый рог верных Твоих Блаже, / и утвердивый нас на камени / исповедания Твоего.

Любовию Христовою присно разжизаем к Церкви Святей, идеже преблаженне взирая, яко агнец незлобив неправеднаго ти убиения.

Кровию ти пресветлою Церковь твоя украшышися, светлы лучи испущает чудес, поюще память ти, достославне.

Зарями Троичными измлада просвещься и Христу наследник, преподобне, бысть, Егоже моли послати мир душам нашим.

Богородичен: Божию Рождеству Ти, Чистая, всяка существа чин преходит чудес: Бога бо пресущна зачат в чреве и рождши пребываеши Приснодевою.

Песнь 4.

Ирмос: Христос моя сила, / Бог и Господь, / честная Церковь, / боголепно поет взываючи, / от смысла чиста, о Господе празднуючи.

Благодетельно измлада в вере чисте воспитан чистыми твоими труды, любовию Владыце последова и надеждою Его льстиваго врага посрами.

Светлотию сияя, святе Вячеславе, грехи омрачены суща, просвети твоими молитвами, с лики мученик имый дерзновение за нас молитися.

Мечи ссекаем, святе, непобедиме, врага лукаваго мечем терпения ссекл еси, тем и венец прият из руки Вседержителя.

Богородичен: Неизглаголаны и непостижимы, Твоего, Богородице, Богоподобно воистинну суть Рождества, земным и небесным, Приснодева, тайны.

Песнь 5.

Ирмос: Божиим светом Твоим Блаже, / утреннюющих Ти души / любовию озри, молюся, / Тя ведети Слове Божий, / Истиннаго Бога, / от мрака греховнаго взывающа.

Твоими страстьми, прехвальне, неболезненную жизнь восприят, святе Вячеславе, страждущим всем явися заступление, на помощь верно тя зовущим.

Паче солнца, блаженне, просвети севера, и юга, и запада пресветлыми зарями чудес ти. Тем нас озари, святе, память празднующа ти.

Сущим в бедах помощник ты бысть, нищим кормление, печальным утеха, тем и по смерти, святе, вся избавляеши верно тя зовущи на помощь.

Богородичен: Богородицу Тя от души, Владычице, миру, Благая, исповедующия Тя спасай. Тя бо Заступление, Непорочная, имамы сущую воистину Богородицу.

Песнь 6.

Ирмос: Житейское море / воздвигаемое зря / напастей бурю, / к тихому пристанищу Твоему притек вопию Ти: / возведи от тли живот мой, / Многомилостиве.

Житие чисто пощением стяжав, Вячеславе предивне, и Ангелом согражданин явися, с ними же моли о спасении душ наших.

Княжение земное оставив временное и царское украшение прият из десницы Вышняго, тленными вечная, яко мудр, стяжа.

Приими похваление из окаянных устен, святе, не могуща похваления ти достойна исплести, и моли Милостиваго Бога даровати нам велию милость.

Богородичен: Пречистая Владычице, Рождшая земным Кормчию и Господа, похотем ми злолютым устрой смущение и тишину подаждь сердцу моему.

Кондак, глас 1.

Подобен: Лик Ангельский:

С лики Ангельскими предстоя, блаженне княже Вячеславе, / наслаждаешься Божественныя и неизреченныя доброты, / и оттуду Благодетельныя дары почерп чудес, / всем притекающим верою / под твою святыню / источаеши цельбам дарование.

Песнь 7.

Ирмос: Росодательну убо пещь содела ангел / преподобным отроком, / халдеи же опаляющее веление / Божие мучителя увеща вопити: / благословен еси Боже отец наших.

Старый злодей завиде ти священному житию наущает на убиение ти безумнаго ти собора. Ты же чистою совестью немолчно Творцу своему вопияше: Благословен Бог отец наших.

Весело ликует Прага днесь, преславный ти град, почитая память ти и чудес ти озаря светло, вся страны созывает вопити: Благословен Бог отец наших.

Лестию прелукаваго древле очервлена быть земля братоубийственнойо рукою. Ныне же кровию окроплься, благоухания жертву Христови приношает вопиюще: Благословен Бог отец наших.

Богородичен: Тобою нам, Девице, свет возсия темным. Ты бо роди Зиждителя всем и Бога, у Негоже проси, Пречистая, присно посылати нам, верным, велию милость.

Песнь 8.

Ирмос: Из пламене преподобным росу источил еси, / и праведнаго жертву водою попалил еси: / вся бо твориши Христе, токмо еже хотети. / Тя превозносим во вся веки.

Веселия добротами, преславне, паче солнца в земли Богемьстей, благодатными зарями свыше освящен, превозношая Христа во веки.

Тело твое святое, блаженне, приим Прага днесь, прехвальный ти град, и предивная чудеса мірови провозвещает, превозношая Христа во веки.

Кротостию украшен, предивне, и разумом благоверия просвещься, Троицы Пресвятей явися воистину прововедник, превозношая Христа во веки.

Богородичен: От света Светодавца Словесе зачат и неизреченно роди Пресущаго. Дух бо Божий, Девице, в Тя вселися: тем Тя поем, Чистая, во веки вся.

Песнь 9.

Ирмос: Бога человеком невозможно видети, / на Негоже не смеют чини ангельстии взирати: / Тобою же Всечистая, явися человеком / Слово воплощено. / Егоже величающе, / с небесными вои Тя ублажаем.

Велии благодати сподобися, славне, и просвети всю вселенную, исцеления всем обильно подавая.

Приими, святе, радость Ангельскую и, предстоя Зиждителю своему, о нас помолися, тебе величающих.

Приими ныне блаженный покой, не престай моляся, преславне, святого блаженства причаститися выну тя величающим.

Богородичен: Богородице, рождшая словом паче словесе Зиждителя Своего, Дево, Того умоли спастися душам нашим.

Светилен.

Подобен: От земли преставися:

От земли приступи к Владыце, преблаженне Вячеславе, прииди ныне духовно и присети милостию поющих днесь честное ти празднество.

На хвалитех стихиры, глас 4-й.

Пролитием пречистыя крове ти, Вячеславе прехвальне, Церковь Христову украси яко царскою багряницею, ею же украшъшися, вся страны собирает на лик, пресвященную ти память светло праздновати и верно Благоделю и Творцу всех вопити: слава Ти, Христе, Удивльшему память святого Своего. **Дважды.**

Яко велика помощника сущим в бедах снемшеся вси, восхвалим, яко прият дар благодати от Спаса Христа: бедныя избавляти и печальных утешати и болезни всяки исцеляти зовущим верою на помощь, и любовию творящим пречудное его празднество. **Дважды.**

Слава, и ныне, Богородичен:

Безвестная Дево, / Яже Бога неизреченно заченши плотию, / Мати Бога Вышняго, / Твоих рабов мольбы приими, Всенепорочная, / всем подающи очищение прегрешений: / ныне наша моления приемлющи, / моли спастися всем нам.

**Славословие великое.
По трисвятом тропарь.**

Тропарь, глас 4:

Днесь Ангели с человеки разуются / вкупе общим веселием. / Небо и земля светло ликуют в память ти, святе. / И мы, грешнии, прилежно ти вопием: / помолись к Владыце о нас, / избавити ны от напасти, / видимых и невидимых враг, / чтущих пресветлую ти память.

Богородичен: глас 4:

Еже от века утаенное, / и ангелом несведомое таинство: / Тобою Богородице сущым на земли явися Бог, / в неслитном соединении воплощаемъ, / и крест волею нас ради восприим, / имже воскресив первозданнаго, / спасе от смерти души наша.